

四庫全書

集部

欽定四庫全書

集部

兩宋名賢小集卷二百

四十五  
四十六

詳校官中書臣孫溶

助教臣常循覆勘

總校官編修臣王燕緒

校對官助教臣汪錫魁

謄錄監生臣朱恩

欽定四庫全書

兩宋名賢小集卷二百四十

宋 陳思 編

元 陳世隆 補

靜軒詩集

徐鹿卿字德夫豐城人嘉定十六年進士調南安軍  
學教授辟福建安撫司幹辦公事都城火鹿卿應詔  
上封事言積陰之極其徵為火指言惑嬖寵溺燕私

用小人三事尤切改知尤溪縣德秀守泉辟宰南安  
德秀尋帥閩疏其政以勸列邑歲饑處之有法最聞  
令赴都堂審察以母喪去詔服闋赴樞密稟議首言  
邊事遷國子監主簿入對陳六事理宗嘉納改樞密  
院編修官權右司贊畫二府會右史方大琮編修劉  
克莊正字王邁以言事黜鹿卿贈以詩言者併劾之  
太學諸生作四賢詩知建昌軍治行大孚田里歌誦  
擢度支郎官兼右司入對極陳時弊改江東轉運判

官歲大饑出本司積米三千餘石減半價以糴及減  
抵當庫息出緡錢萬有七千以予貧民兼領太平仍  
暫提舉茶鹽事移浙東提點刑獄加直秘閣兼提舉  
常平經界釀地先撤相家所築就捕者自言我相府  
人鹿卿曰行法必自貴近始卒論如法丞相史彌遠  
之弟通判溫州利韓世忠家寶玩籍之鹿卿奏削其  
官後累擢皆辭淳祐三年以右司召猶辭丞相杜範  
遺書迺出擢太府少卿兼右司入對願早決大計上

欽定四庫全書

兩宋名賢小集  
卷二百四十

二

嘉納之遷右文殿脩撰知平江府兼發運副使力勾  
祠上諭丞相挽留之召權兵部侍郎固辭上令丞相  
以書招之鹿卿至又極言君子小人切於當世之務  
上眷遇深篤而忌者寢多有撰偽疏託鹿卿以傳播  
歷詆宰相至百執事鹿卿初不知也遂力辨上前因  
乞去上曰去則中姦人之計矣令臨安府根捕事連  
勢要獄不及竟遷禮部侍郎累疏告老授寶章閣待  
制知寧國府而引年之疏五上不允提舉鴻禧觀遂

致仕進華文閣待制卒贈四官鹿卿居家孝友喜怒  
不形恩怨俱泯宗族鄉黨各得歡心居官廉約清峻  
毫髮不妄取一廬僅庇風雨所著有泉谷文集手編  
漢唐文類文苑菁華諸書諡清正

酬張直學

章水元通劍水流  
揭來庠序行同遊  
自從快蹋梅花雪  
一洗從前茆瘴秋  
官況我今忘獨冷  
鳴聲君合起相酬  
龍光自有張華識  
句不驚人未便休

欽定四庫全書

兩宋名賢小集  
卷二百四十

三

酬黎丞見和

極目龍門峻接天，仕途傾蓋便忘年。  
太平官府閒吟竹，勝處園林笑舉鞭。  
松栢凌霜知獨後，樓臺得月會居先。  
老臣憂國誰能識，飛雪飄飄上鬢邊。

士友見和七月七日曝書依元韻謝之

寒儒家世派南州，天遣芹宮並俊遊。  
劒水章江千里月，天孫河鼓一番秋。  
曬書舊事聊同郝，聯句新聲恐類侯。  
隔歲槐黃頻入夢，曾知山角已生不。



護法寺勸農呈史君

半載分符江水西何曾一日事遊嬉  
忽聞千騎傳呼曉正是三春勸相時  
父老倚鋤聽號令兒童騎竹望旌麾  
東風歸路歡聲滿野草閒花索賦詩

興教寺勸農呈史君

自從幽雅無傳後漢有龔黃宋有羅夙  
駕朱轡勤勸相奉宣黃紙放催科  
一犁煙雨郊原曉千里春風嶺嶠和  
看取便民橋下水滿江濃綠漲恩波

湛泉酌餞黎丈有詩壁間遂次其韻

幾人林下賦歸休公獨翩然汗漫遊味道不妨寒似水  
入時須用曲如鉤從來鄰父邀皆去底事官曹挽不留  
後夜相從那復得月明千里故山秋

陳府判邀遊梅關

庾嶺蒼蒼古復今公餘杖履愜幽尋兩崖峭壁風霜骨  
一片清泉佛祖心靜浣世緣揮酒椀更添春色上梅林  
冥撝翻覺詩情拙滿眼皆詩祇用吟

勸農上宮教

竹馬兒童喜欲狂，循良太守似龔黃。  
倉庾百囷蠶桑啟，布穀一聲稷稻香。  
耕饁盡陶豳國化，嬉遊已徧舜民鄉。  
文書便合登高閣，為說東郊入務忙。

愛山堂二絕

橫江江上四山環，少得當前面勢寬。  
試上此堂舒遠目，疎林靜處見峯巒。

自有堂來三換扁，官居賢否只山知。  
酴醾嫵媚今何許，

山色清妍宛舊時

和杜子野湛泉詩來詩有塵事分清事之句

榕陰漠漠俯清泉淺溜涓涓不計年未必塵紛敗佳思  
凭欄得句却天然

鬱孤洞天

夢跨長虹海上遊寒生肌骨一壺秋好風吹得詩魂醒  
自寄人間翠玉樓

湛泉送客

中年懷易惡更聽斷腸聲多謝雙榕樹逢人管送迎

兩宋名賢小集卷二百四十

欽定四庫全書

兩宋名賢小集卷二百四十一

宋 陳思 編

元 陳世隆 補

蘿軒外集

楊備字修之建平人億之弟慶厯中為尚書虞部員外郎分司南京上輕車都尉有姑蘇百題金陵覽古詩

烏鵲橋

在長洲縣東以  
烏鵲館得名

月滿星移水照天  
南飛烏鵲影翩翩  
雖然上屬牽牛分  
不為牽牛織女填

雙蓮堂

雙蓮倒影面波光  
翠蓋風搖紅粉香  
中有畫船鳴鼓吹  
簫然驚起兩鴛鴦

金陵覽古雜詠十首

汝南灣



汝南王昔過江東此地名將汝海同玉尊濯來人易醉  
有時人面照花紅

濛汜池

春條拂岸柳如金一鑑澄空照底深  
傍見龍舟赭袍影分明紅日在池心

九日臺

甲光如水戟如霜御酒半浮菊半黃  
東日西風滿天仗簫韶一部奏清商

桃葉渡

桃葉桃根柳岸頭獻之才調頗風流相看不語橫波急  
艇子翻成送莫愁

幕府山

六代繁華一瞬間平蕪遠樹不勝閒倚樓天暝雲如幕  
知是瑯琊幕府山

橫塘

早潮纔遇晚潮來一一軒窗照水開鑑面無塵風不動

分明倒影見樓臺

白都山

駕鶴駢鸞自古聞  
策名仙籍是真君  
天邊舊跡無尋處  
滿目青山空白雲

春磻

手拖葛屨坐藤牀  
竹樹蕭然一水旁  
枕上白雲船下月  
卜隣東磻勝東岡

烏衣巷

人物風流往事非  
空餘陋巷作烏衣  
舊時簾幙無由覓  
祇有年年新燕飛

白鷺洲

春信風生晚汎潮  
印沙羣鷺立還翹  
凭高一片迷人眼  
蘆葦叢邊雪未消

陸機宅

陸家兄弟頗能文  
入洛仍將筆硯焚  
舊宅荆榛狐兔窟  
機雲無復有昆雲

天闕山

牛頭天際碧凝嵐  
王導無稽亦妄談  
若指遠山為上闕  
長安應合指終南

青溪姑

曩不乘龍即跨魚  
岸旁人復乞靈無  
柳如眉黛花如面  
間說清溪一小姑

青溪柵

傾城傾國兩妃嬪  
此地聞名不見人  
潛想舊時紅粉血

落花風裏步香塵

江令宅

竹木池臺尚儼然  
歸時頭鬢雪霜寒  
青溪隱隱朱門處  
曾屬中書一品官

兩宋名賢小集卷二百四十一

欽定四庫全書

兩宋名賢小集卷二百四十二

宋 陳思 編

元 陳世隆 補

翠微南征錄一

華岳字子西為武學生輕財好俠韓侂冑當國岳上書云云書奏侂冑大怒下大理貶建寧園土中郡守傳伯成憐之命獄卒使出入毋繫伯成去又迁守李

大異復寘獄侂冑誅放還復入學登第為殿前司官  
屬鬱不得志謀去丞相史彌遠事覺下臨安獄獄具  
坐議大臣當死寧宗知岳名欲生之彌遠曰是欲殺  
臣者竟杖死東市

歸釣吟

我生本是絲綸客嘗把絲綸釣王國膠庠雖識姚有虞  
載車未遇周西伯抱琴歸去古江邊江頭風月猶依然  
江風刮岸岸如削江月照人人未眠沙平浪靜江天濶



換酒捉魚魚潑刺有時醉挽和月吞有時醉棹和烟撥  
或唱歌或吹笛歎乃宮商人不識歌聲喚徹烟水寒笛  
聲清透雲霄碧不張帆任渠去去到雲山深處住雲山  
深處有畫圖添箇雲山畫圖侶不撥棹任渠流入玻  
璆影裏頭玻璆影裏迸珠玉千斛萬斛誰能收倦時眠  
醉時舞漁家自有神仙府睡時蝴蝶夢莊周舞處鷗鷺  
奏韶武自舉歸釣吟清江漠漠烟沉沉雲藏萬壑暗水  
尾風吹孤月搖天心翠微父翠微父和我行歌進南浦

畫橋流水抹晴烟殘照暮霞收宿雨水連天天似水一  
蓑活計誰能比楓葉飄霜鱸膾香楊花飛雪河魴美也  
不學姜太公百年將至方非熊會須年少遇真主恢我  
諸夏車書同也不學嚴子陵雲臺不為魁殊勲中興只  
作釣臺侶胸中百萬知無兵我網不似漢漢網何太疎  
也曾漏却吞舟魚何當周密如樞機直欲纖悉皆無遺  
我釣不似呂呂釣何太直除却文王有誰識爭如猛曲  
一彎腰牽取星珠并月璧魚膠寒齒折蒿剔蟹螯刺指

和籠烹屠龍餽鼎口不美斷鯨斫炙腸聊撐

記夢

溪泠泠鼓鼙鼙虛堂浙漚生寒風寒風綽我夢魂去飛  
颺直上蓬萊宮蓬萊宮殿女如玉霓裳羽扇環簾櫳月  
娥留我宴珠翠玳筵間列花叢叢酒酣萬念羅心胸舉  
盃話別殊忽忽青鸞命駕下空濶一聲璫珮鳴丁東被  
衣起坐周四顧庭戶悄悄無人蹤銀河萬里倒澄碧冰  
鑑半輪斜倚空橫江孤鶴一聲唳喚起鄉心千萬重

上韓平原

君家勲業在盤盂，莫把頭顱問鑄鑊。  
漢地不埋王莽骨，唐天難庇祿山軀。  
不隨召奭始求老，便學孔明終托孤。  
十廟英靈儼如在，漫於宗社作穿窬。

清富樓

楞伽心地有瞿曇，清富名樓足可觀。  
買斷江山詩料俗，揭開風月畫圖寬。  
都無一點紅塵到，便作千雙白壁看。  
我欲鞭驢快幽賞，白鷗盟在不憂寒。

去年清富屢求詩今日凭闌約翠微  
山帶野花堪入畫  
水環汀草欲成圍  
一園黃菊有餘食  
兩頃白雲無限衣  
說與塵寰守錢虜  
不勞魂夢到禪扉

矮齋

屋老塵生索椽低帳不緜  
炙燈烟染棟見客帽翻簷織  
壁慳三尺遮門斷半簾  
吾身交九四控制萬愁兼

容膝

具體功非遠全軀恨已消  
安禪須促趺覓句敢成搖  
悔

不自  
卷二 百四十二  
不身齊足時當事半腰行人只蒲伏何處得逍遙

野飲呈祝山甫

野景何須買山花不待培幕天分古木裊地得蒼苔酒  
上鶯調曲看空鵲墮梅一壺隨所適何處問蓬萊

題練省元壁

腳債嗟猶欠心朋喜偶逢溪聲含客怒山色為誰濃古  
樹晴搖蓋殘蟬晚帶鐘莫辭一樽酒明日是吳儂

讀漢史

漢將假帝為真帝齊乞真王作假王大抵紀韓皆是信  
不知誰短又誰長

寄王五四將仕

季叔青天轟霹靂屈原平地溺波濤從教晉楚多戕賊  
二子何曾損一毫

周田且謂曾占易商野何嘗識夢書假使二君無感召  
不成終老在樵漁

出郭

十客聯鑣出北門馬蹄剗盡碧苔痕從教管史占星聚  
且聽盃人和月吞我欲求仙問離坎君當隨佛整乾坤  
樽前恍慨休辭醉明日有懷誰共論

有地都來一丈餘墾鋤元不費工夫匝牆先種竹三本  
遶檻却栽花數株風伯喚來煩解珮月娥邀得醉攜壺  
憑君試向蓬萊問還有神仙似我無

送周魁

昨夜霜風鼓萬兵今朝華節照邊庭人間元日是春日



天上魁星為使星且向虎囊探尺寸却歸麟閣做丹青  
離觴不是延清夜明日異邦長短亭

梅

衰蘭枯荷了秋色幾向寒梢問消息溪橋交馬斷腸時  
翠袖佳人日暮歸玉面亭亭漢宮樣一見風流慰心賞  
寒標孤絕太無情誰為移春上玉京月華淒切霜華白  
夜半飄香度簾額寄聲橫笛且休吹愁殺江南未歸客

山水吟

閩之山峨峨可以接穹蒼閩士孕其秀胸次尤難量閩  
之水滔滔可以燭妍醜閩士生其間其美不容口君不  
見周家社稷生甫申崧岳當年曾降神又不見千里秀  
氣鍾三蘇眉山草木皆焦枯我生恨不由河洛虛負三  
光并五嶽地靈人傑推江東人物風流兼磊落顧此閩  
之東自古多英雄求其為絕稱獨一忠穆公公今已即  
世後世誰可擬惟有詹仲通一人而已耳仲通何如人  
景星與鳳凰不陰亦不深山高兮水長

二月二日即事

春潮昨夜沒平灘一雨催花色半含  
雁喚元宵歸塞北燕銜新社到江南  
無歡不必遊花籍有病何須置藥籃  
只把公忠答天地從教兒女鬧冠簪

登樓晚望

六曲朱闌瞰碧虛淡烟秋水接平蕪  
展開風月添詩料紫點江山歸畫圖  
舉足便堪馳駟馬折腰何必問雙鳬  
當年庾亮今還在定約樓前醉一壺

訓爨婢

十載膠庠莫怪窮旅囊安得有從容無錢休欠牛羊債  
有酒只將魚鱉供班領昔嘗肥似燕沈腰今已瘦如蜂  
從今莫恣肥甘口只擷清蔬祭豢龍

別藍詳道

君在江東我水西君今北去我南歸竹孫和客凌風瘦  
梅子偏他得雨肥鶯嚙好聲歸酒暈花分紅影上人衣  
相看莫作皺眉別期子秋高賦式微

傷春

初入京華菊薦香途中今已過春芳  
十年恰走萬餘里兩鬢幾乎一半霜  
却酒不禁春黯淡落花愁對月昏黃  
不堪夜半歸心切更被杜鵑啼斷腸

約叔叔真

半間屋抵斗來大一箇身同山樣高  
側坐斜眠俱不得煩君除去一牛毛

庀堂有事留司馬凌閣無名問大宗  
我且盤桓君且去

歸期千載約芙蓉

題窗間

陽貨不名真盜王子張何事便書紳聖賢立論有微旨  
精義當求妙入神

浴

龍藩地暖冬無雪十月風光似三月好風不動綺羅塵  
人在繡幃簾半揭酒腸拍索能回春春潮入面香熏熏  
香肌汗透披縠紋思得滄海驅埃氛銀鍋解眼生春雪

銀瓢掇破鍋心月流霞傾入碧琅玕香霧氤氲雲半掇  
花藤織出金芙蕖烟青闌紫堆雲闌一聲璫珮簾鈎垂  
皂盤捧出雙明珠蠟花照入蘭湯閣珠璣體迸紅猊活  
鳳谿雲濤濯錦毛龍翻雪浪澆銀甲起擎裙霧圍春風  
暎巾抹出堯花紅香泉入齒漱寒玉吐作冰雪飛長空  
蒼頭急把春衫換腕玉輕穿雲一片出門兩腋生清風  
身在嫦娥廣寒殿

嘲熱

南方有神名祝融髮赭面丹唇朱紅執鞭入海驅赤龍  
火車勒駕燒長空千驂萬乘如聯轡烈焰騰騰灼天地  
九霄烜赫皆甑蒸四海煎熬俱鼎沸流金爍石氣不通  
天下俱在紅爐中葛衫襟濕疑有雨羅紈柄折渾無風  
祝融祝融無太酷天道炎涼常反覆看看少昊催戍瓜  
盡把涼颼散煩溽

別子陳子

丙寅三月三十日天子檄我南國行蒲劍欲飛春漲急



柳綿才脫曉寒輕事非得已初何好物到不平終作聲  
自古英雄總多難落花何必怨清明

河魀

形容初不類魚鰕偏稱蘆蒿與荻芽觸物可憐空怒腹  
嚙人無計漫聾牙子排金粟真堪畏乳溜玉酥何足誇  
從此烹鮮督庖吏只將鮎鰕假名他

自嘆

自嘆身謀我獨疎只貪風月恣歡娛盃盤遇客隨多寡

囊底何時問有無  
萬里梯航無骨董  
十年牆屋有穿窬  
從今老去無他望  
綠綺一張醪一壺

春日書懷

紫褪紅消到海棠  
幾多遊俠為渠忙  
秋聲落盡鶯調曲  
春色惱人花鬪香  
羝乳雖能屈蘇武  
牛衣終不卧王章  
男兒多少英雄氣  
只對東風醉幾場

兩宋名賢小集卷二百四十二

欽定四庫全書

兩宋名賢小集卷二百四十三

宋 陳思 編

元 陳世隆 補

翠微南征錄二

華岳

宣城道中

躍馬上宣城千山翠欲顰蕙風輕卷舌櫻雨細沾唇柳

絮難驅臘榆錢不買春何如澆一斗爛醉石湖濱

當途道中

春晴不忼慨十日九清陰蝶宿花留粉鶯眠柳借金邊  
塵方障眼漢壁尚關心醒去愁無奈盃行滿滿斟

壽昌道中

山斷疑無路林開覺有村饑牛戀茅隴吠犬護柴門悶  
去詩千首愁來酒一樽明朝南去路懷抱與誰論

過西溪

路隨馬足難知數  
山疊魚鱗不記名  
隔岸青帘人不渡  
一溪流水暮潮生

題蓮華壁間

風外落花千萬片  
水邊啼鳥兩三聲  
無情驚起陽臺夢  
獨倚閒窗看月明

贈呂元珙

周末見人歌采芑  
楚先聞客賦離騷  
胸中有氣不能吐  
空使虹蜺萬丈高

欽定四庫全書

詩集卷之四十三

釣鼇行

北風浩蕩滄溟濶千萬軍聲夜潮聒翻空濁浪鼓雷霆  
舟子停蘭面如血龍門有客何崢嶸怒目張膽殊不驚  
桅檣破浪裂津島直欲一舉空蛟鯨我之釣兮非世比  
新月為鈎索霞綺先拗虹蜺為釣竿却把鷗鵬作香餌  
欲垂未垂號鬼神星斗無光天地昏海靈乞命免生死  
一鈎連六盃銜恩我公萬里風烟伯度量汪汪震海窄  
蟠胸高聳蓬萊山壯氣直吞雲夢澤恩波萬壑奔洪流

風帆浪楫交觥籌金鱗照日巨如斗四海觸物無虛舟  
我生本是釣鰲客幾歲灘頭望風色忽聞霹靂破崑崙  
便整絲綸駕航舶我今十牓迎公開會須舉手生風雷  
不然長嘯謝水府明月滿船歸去來

上趙漕

太山之巔有喬松凜凜千丈摩蒼空風雲有會直相際  
轟雷掣電蟠蛟龍盤根錯節真天種卿月郎星伴辰拱  
高風蕭瑟涕清泉桃李無言漫丘壘南宮仙桂饒天香

欽定四庫全書

卷二百四十三

南國蔽芾歌甘棠大枝擎天作砥柱小枝駕海成虹梁  
六月無風天欲雨赤龍銜火燒空宇亭亭橫蓋指扶桑  
萬壑千厓冷無暑大椿可笑欺莊周便指千歲為春秋  
使民若戰夏后社用汝當作商川舟自慚藤蔓纏林壑  
未遂鷦鷯一枝樂盤桓已喜跨高寒更借扶搖薦鵬鶚  
我聞處士方綢繆三友簡在公寧留蒼姬已託大夫蔭  
赤子願陪丞相遊

過文脊山



百峯攢碧版橋西眼力增明步武遲紅映竹籬花笑容  
翠翻雲幕雨催詩簣還及第吾何媿廣不封侯子未思  
凡物不齊皆有謂到頭忠義是男兒

熱

翠微家在大江東五月鞭驢入建中雲烈火車天欲雨  
汗淹香葛扇無風不求殿閣千間庇却喜巖泉一線通  
為汲滿盃清齒頰與君行盡夕陽紅

有感

十年憂患客江城雙鬢蕭蕭已不禁多病不逢醫國手  
感懷徒有濟時心西風吹夢夜寒悄黃葉滿階秋意深  
休笑當年杜陵老白頭今亦不勝簪

悶中賡趙丞韻

壯士不同兒女曹誰云賦性太龔豪一編韜畧進擒虎  
十摺絲綸學釣鼇劍口不磨韓信血鼎心須刮食其膏  
英雄多少不平氣一夜朔風爭怒號

秋宵有感

滿目秋容拂畫圖  
敗荷衰柳接平蕪  
西風刮地鴈聲落  
寒月滿天人影孤  
木耳有才持紫橐  
楮皮無計換青蚨  
不知此去功名事  
還許封爨見也無

過羊腸嶺

拂面東風吹夕陽  
路蟠千折過羊腸  
山疑隨馬回回見  
花欲撩人故故香  
世路與誰分曲直  
人情於我自炎涼  
何當更上風烟上  
為把窮途問彼蒼

宿橫溪橋

夜宿橫溪烟霧間  
眉頭歸路萬山攢  
連天麥浪波千頃  
撲地楊花雪一團  
餘鏹不供春後醞  
夾衾猶怯夜來寒  
征夫莫怪車音澀  
自是愁多行路難

初抵富沙

芳草不隨春水綠  
連山猶帶夕陽明  
人生有酒且行樂  
休向河梁問子卿

鞭鐙兩三千里路  
樓臺數十萬人家  
長虹不吸秋江水  
一夜扁舟懸雪花

呈周及之貢元

一頭却過六七嶺兩足幾乎百十斤  
恰喜故人能下榻  
檠窗樽酒細論文

寧川冷渡

峯回路轉六七里林靜鳥啼三四聲  
遊女不知行旅恨  
一茶留我話平生

宿灌頭

淡魚纔煮醢魚熟白酒新篘紅酒香  
莫訝盃盤成草草

一年忙處是蠶桑

南浦水閣

橋橫南浦虹千丈，柳護西溪翠一行。  
佳麗不知滋味惡，插花臨水照紅粧。

次李信州七十韻

挺挺萬人傑，堂堂間世賢。  
胸中兵千萬，足下客三千。  
揚賦希三嘆，坡詩和百篇。  
錦囊華似袞，綵筆大如椽。  
隨陸縱橫舌，良平左右肩。  
兩駟公子服，四牡魯侯旻。  
量濶滄

溟岸胸蟠泰華巔紅壇歌魯杏白社結陶蓮遣幣通秦  
好求姻託鄭媿匣藏須虎兕冠飾待貂蟬幪自龍頭奪  
書由雁足傳不侯咄李廣求使短張騫食客希毛遂茶  
僧集大顛詩材親子建字法邁公權黃貉蒙金絡青驄  
勒寶韉代燕欺騎劫聘魯慢韓穿周室歌山甫齊人美  
仲連劍從豐水鑄碑向峴山鵠有頌褒唐太無詩刺衛  
宣檄堪傳代郡節可仗居延聽訟踈淹禁豐財剔冗員  
策從之反後鞭著祖生先孝有參而已忠如丘者焉春

水同皎潔秋月共嬋娟冢宰當鈞軸將軍事繫鞬干官  
視標準萬國倚陶甄多士圓冠帶諸侯執豆籩山期封  
泰岱石擬勒燕然禹甸期環轍堯氓願受厘明堂歌赤  
紱清廟頌朱絃臺閣皆三益盤盂記十愆片言能息訟  
隻手可旋乾公昔嘗推轂吾今尚食饘聞雞效劉舞抱  
虎笑秦眠蘇子舌猶在邊韶腹尚便牛衣懷白璧虎節  
誓青氈飲馬量淝水屯兵料漢田鬢星飛洛汴血雨洒  
伊瀍尹五成湯就軻三孟母遷雲鋤翻楚嶠月纜繫秦



川甕有扶頭酒厨無縮項鰯詞源慚子美詩社感庭堅  
水陸三千里炎涼二十年周田纔廢井秦陌已開阡夜  
月琴三弄春風詩一聯自稱山宰相人號地神仙扣馬  
羅三尺平戎授一編鼠投當忌器魚得偶忘筌避地思  
無所滔天罪莫湔梁鴻方北謫賈鵬已東旋孫刖難謀  
魏樊誅莫救燕江天驅鳥雀淮地迅鷹鷂日守奴訾分  
星流太白躔瘡痍連四境煨燼極三邊淮浪夜翻雪邊  
塵晝起烟二陵歸培塿百闕

自撫劉生几誰思

祖逖鞭戍方興頡利役莫

闕

漫宮昔嘗游泮扉今漫

歎園豈知醫國手變作

闕

楚客弓雖失秦人璧幸

全宦途良可畏吏鞅不

闕

世變言難盡民頑令不悛

一千新楮券三百舊銅錢駟馬涎流地羣鳥翼蔽天人

心徒擾擾王道自平平衛女歌淇澳曹人思下泉窮途

惟自媿當路有誰憐作俑宜無後追俘恐不前詩成何

太喜舞袖欲蹁躑

送倪尚書赴台

守節如初未足觀毫釐終始實其艱鄭公勇却樞衡貴  
衛叔羞居荷橐班冷暖萬端炊飯頃是非一著奕棋間  
江湖無限孤高客拭目看公此召還

宿嚴瀨

遐想高風殊未涯  
檣舟夜訪子陵臺  
銜山西照情何限  
逝水東流夢不回  
雙漿未聞鄉月過  
一尊先為客星開  
東都人物俱煨燼  
獨有先生迹未灰

顯澤民廟

生握藩旌死象黎澤民山下澤民歟蒼天九重開日月  
赤地千里興雲霓假寐商宗曾得說爵高韓信屢封齊  
英雄不入蒼生眼願借高風吹馬蹏

早春即事

楊柳絲絲美淡黃怯寒燕子未歸梁曉迷芳草驢駿濕  
夜宿閒花蝶翅香得句自慙非子美賞音猶恐誤中郎  
願言相約花前醉莫放春容過海棠

早行述懷

歸心夜半已飛揚  
喚僕吹燈促晚裝  
鷄翅拍斜茅店月  
馬蹄剝破版橋霜  
二陵萬里埋荆棘  
十廟百年生稻粱  
安得有臣如祖逖  
慨然擊楫誓江長

題易村

路轉峯回覺有村  
數間柳屋瞰山陰  
午炊已飽翻匙玉  
臘醞仍拚挂杖金  
窮去作文和鬼送  
興來得句倩蟬吟  
一聲橫笛斜陽外  
吹起江湖萬里心

秋晚獨步

十分秋色著  
品桂幾陣晚涼催  
井桐自恨異鄉知  
遇少  
一尊相屬與誰同

兩宋名賢小集卷二百四十三

欽定四庫全書

兩宋名賢小集卷二百四十四

宋 陳思 編

元 陳世隆 補

翠微南征錄 三

華岳

後溪

蓬窗夜雨短長夢啼鳥喚人新舊愁萬里論文一樽酒

醉和明月上扁舟

泉聲恰似世情惡  
山色不如歸興濃  
自恨十圍無處著  
何如瘦作束腰蜂

楊花

一絲不染湖光白  
萬點能回山色青  
三月金明池上水  
與予同是一浮萍

杜鵑

殘月照愁人  
病酒好風吹  
夢客思家欲  
知亡國恨多少



紅盡亂山無限花

鄰女搔綿吟

閒窗日上三竿竹牕下嬌娥整輪輻  
匆匆未暇理雲鬟半朶青鴉倚紅玉  
青梢摘盡銀香囊畫欄平倚斑筠筐  
時將纖手翻雪霜酥胸玉面同光芒  
捧歸細捲銀成索牽出鬆鬆雲一握  
珠唇呵挺氣溫溫鸚嘴踏車聲絡絡  
今年莫恠功績稀阿妳勒繡鴛鴦幃  
如今織出秋江練十月正好裁新衣  
客心聞此愁無著一夜清寒動寥寞

明朝為問買一端剪做道袍披落魄

送商府判

比年十月君初來梅花破雪迎君開自從佐劔壽民脈  
涸山瘵水皆春臺去年七月君開府燕燕鶯鶯為君舞  
五日盡蟄潭底龍千里應無市中虎今年二月君時歸  
風牽回柳縈君衣君衣不作回柳轉直上雲端朝紫微  
紫微有館名西掖珠玉羅鈿瞰金碧郎星卿月漫徘徊  
箇中自是神仙宅紫微有山名大坡烏飛豸立冠我我

一聲霹靂震天地萬里腥血流江湖紫微有旨垂丹冊  
二者於斯請君擇便須東取元化鈞談笑從容正疆場  
君家事業銘冠裳鸞鳳指日鳴朝陽伊洛諸公有政事  
洙泗諸子無文章稟違輾轉情難處溪上恩波湛今古  
東風吹帳入長亭零落桃花淚如雨

述事

心不融明遂啟疑源流本末致交馳谷何嘗響人相笑  
岸幾曾行舟自移枉直萬端明似鏡是非一著錯如棋

磨心拔去誰能轉試問諸公知不知

述懷

我生不解覓冠裳滿目風波祇自傷楮券不堪供敵幣  
沙籌那解足軍糧人情在我隨多寡世態從他自短長  
只告天公乞安樂百年隨分老農桑

寄劉浩然

樽酒檠窗鬢髮新別來驚見雪霜侵幾行淚滴風前燭  
一片心敲月下砧好德未聞如好色知人安得似知音

一書欲寄南來雁江濶天高無處尋

知遇

淮陰西漢一英雄史氏持衡論亦工不向追亡羨蕭相  
却于援死著滕公豈知並績三人傑皆是當時一語功  
後世人材自戕賊炎涼安得古人風

和我

納幣求成事已非可堪函首獻戎墀一天共戴心非石  
九地皆塗血尚泥反漢須知為鼉錯成秦恐不在於期

和我自有和戎策却恐諸公未必知

別王泰之

風神戀行客吹柳纏簪纓傍水鳥多白近山蟬更清別  
腸雲閣淚歸路月關情告德無多日清觴聊一傾

遊溪西寺

寺覺重遊好僧期後會賒青蟲凋病葉白鳥篆平沙水  
瘦石生齒山寒梅未花功名今有待且謁惠公茶

登樓晚望

疎雨洗空碧晚晴人倚樓稻花千頃浪楓葉一簾秋遠  
岸明殘日孤村認小舟溪山如愛我相見亦回頭

悶迷

雁翎未忍剗丁謂虎口猶期脫蔡京何事姦邪皆倖免  
洛陽年少却南征

有鼎不烹

關

肉無刀可斷佞臣頭男兒此等不平氣

空使衝冠射斗牛

酒禁

將軍愛士民心失太守憂民士氣衰大抵軍民皆赤子  
如何從此便藩籬

贈美人別

花臉送愁和露泣鶯聲傳恨向人嬌別情遠去尤難割  
相送不須離畫橋

寄宗上人

我為叩閤拘狴犴汝將吟筆換袈裟別來猶記松窗外  
一掬清泉自點茶



自寬

十事相尋九不諧  
骨窮更值五行乖  
人情厚薄且隨分  
世態炎涼休掛懷  
家欲自豐無楮幣  
鑾憑諸執有荆釵  
如今且任眼前過  
他日功名殊未涯

黃氏三層樓

瘦筇支我上高寒  
風露淒清酒力慳  
千里人邀千里月  
一重樓見一重山  
筵前飛雪噴焦燄  
檻外行雲遏小蠻  
便好翻身駕黃鶴  
直將情枉叩天關

幽居

莫問門無長者車只圖深巷樂樵漁一園黃落食無限  
萬壑碧蓑衣有餘雁足北來歸訊杳馬蹄南去故人踈  
東風看整朝天旂多少功名在故廬

賀趙丞登第

要與宗盟立紀綱俯從多士較文章人材漏網無踈密  
科目搜羅有短長蟾窟一枝分玉樹鳳池三浪出銀潢  
何當推解延豪杰為復中原萬里疆

梅

一年無處覓春光  
杖策尋春特地忙  
牆角數枝偏冷淡  
江頭千樹欲昏黃  
梢橫波面月搖影  
花落樽前酒帶香  
更仗西湖老居士  
為予收拾付詩囊

捉月仙

纜解西風拍岸顛  
雁拖秋色上航船  
挂帆未作乘風客  
舉棹先驚捉月仙  
楚些有淵心石殞  
賀狂無并眼花眠  
慇懃為酌一盃酒  
斷送西江浪拍天

呈甯次翁

王謙不是富春侯，自是薰蕕味不侔。  
病體隔年留枉獄，夢魂連夜逐歸舟。  
可憐商木遷新令，欲為韓門復舊讎。  
但得此心無所媿，為公一死亦何尤。

悶成

勿憂李廣不封侯，廣不封侯未足憂。  
漢鼎不烹曹操肉，吳鉤空斲伍員頭。  
鴻門自昔推屠狗，虎帳於今媿沐猴。  
千萬南陽遇徐庶，為言豪傑尚縲囚。

平政橋

建水合流三百里直下富沙如撚指溪東披拽纜過西  
千丈春風怒濤起香輪不解碾清江造舟貫索成河梁  
年年麥熟梅欲黃連城千里皆波光淳熙太守憂漕洧  
問津日夜思無計老農叉手願鳩工疊石中流便民濟  
金珠賣價不計絀鐫瑕斲梓功方成功成燕雀賀新屋  
炳然萬棟輝丹青挿天蟠螭橫江尾下壓寒潭碧無底  
市聲不到畫梁間秋色盡歸朱箔裏我行一月無風波

今朝醉眼翻青羅金鰲背路客揮鐙玉虹跨浪舟飛梭  
石唇噴盡寒崖雪雪中電掣金蛇赤兩岸樓頭將相家  
八州車馬神仙客人言辟人推政平故此特以平政名  
我聞政事平如水水到不平還作聲

贈陳道

君不見樵人王翰畫山水一夜風雷揭窗紙又不見長  
沙洞清畫龍蛇滿軸雲烟翻撚指二子相去數百年筆端  
妙意誰能傳雙溪道人何所授一見筆法堪齊肩筆一

淡輕烟映出垂楊岸遠山依約有還無斜照不紅秋水  
慢筆一濃黑雲萬疊翻狂風江天日暮暗烟靄天地星  
斗昏昏朦瀟湘詩人不解語被君吐作無聲句何時覓  
取一幅綃寫我英姿伴烟雨

柴氏

節婦一樽酒義士拜而受義士一首詩節婦雙眉皺眉  
皺意何如有難難相救嘆我廊廟器淹回在汚陋惠我  
旨且嘉殷勤推意厚吾今繫閩建家貧喜鄰富青眼到

朱扉白屋成華胄吾聞孤竹子周室三緘口又聞杞梁妻秦邦稱烈婦此輩誠間生世代不常有如何天一方同時俱輻湊媿無八品珍草草具籩豆何當再拜掘我衣卮酒恭為兒女壽

別館即事

十年客裏過春光客裏逢春分外狂半堵碧雲蝸路濕一簾紅雨燕泥香銜山西日辭春閣拍岸東風趁夜航莫向錢塘蘇小說東吳新髻李紅娘



武興解舟

西風落日楚江頭  
秋水已平鸚鵡洲  
烟樹接天迷送旆  
浪花翻雪噴行舟  
三盃萬事我已飽  
一日千里誰能留  
見說平戎新遣使  
班超投筆已封侯

不遇

英雄不遇勿長吁  
苟遇風雲彼豈拘  
不向關中效蕭相  
便於江左作夷吾  
當知晉霸非由晉  
所謂虞亡豈在虞  
多少英靈費河嶽  
鍾予不遇獨何歟

紀事

鉗口割腸未足彈窮源探本可觀瀾乞醢就謂隣非直  
反矢須知友必端暴虎欲從頭碎壁沐猴還慮髮衝冠  
積薪厝火居其上試問賈生安未安

兩宋名賢小集卷二百四十四

欽定四庫全書

兩宋名賢小集卷二百四十五

宋 陳思 編

元 陳世隆 補

翠微南征錄

四

華岳

傷春

衣袂怯春寒  
春在江南岸  
我意正傷春  
復被春縈絆  
一

雨臙脂濕萬壑冰漸泮撩我惜春心與春傷爛漫柳垂  
不染絲織成愁一片杏吐無烟火燒碎腸千斷憶昔腰  
如柳柳腰舒易按憶昔面如花花面嬌難喚人不似春  
芳隨處得看翫因春憶昔人不見徒扼腕何時醉卧花  
柳中一笑千金不容換

百舌

流鶯一去無消息燕怯春寒歸未得綠窗清晝靜無人  
似把衷情訴知識上苑東風二月春淡黃楊柳初成陰

解將一片無情舌學盡百般能巧禽紅英紫萼紛如雪  
萬姹千嬌總饒舌莫嫌花外太啁啾點點難酌好時節  
須臾綠暗紅亦稀伯勞杜宇鷹鷂飛更兼獵弋恣羅網  
卷舌不語全毛衣堪嗟國士徒切直不似幽禽明語默  
何如鉗口歸山林莫問燕南并越北

飲仙閣

槽頭壓盡春山綠槽下真珠瀉醺醺騷人一笑傾盃盤  
滿面春風漲紅玉少陵得此不欲言乃指八子為中仙

主人傾蓋慕此意一閣新構堂西偏於今世態薄於紙何  
必勞心問青紫願君醉我金屈卮萬事過耳同風飛醺  
醺和月上栽竹長嘯一聲歸翠微

贈祝跛

我生多蹇難事業冷於水外內兩五行醜惡諱人舉武  
夷有跛者抱術徧荆楚捫衣忽趨隅覲面便相許搖手  
無所需再拜拂毫楮一詩聊贈行無以壯箱筥他時了  
功名為結烟霞侶

富沙道中述懷

敗鼓非全材毀瓦不自牧造物兒未戲達人火先撲  
不到渭濱人徒嗟海曲彼哉真彼哉伐盡牛山木

驟雨

牛尾烏雲撥濃墨牛頭風雨翻車軸怒濤頃刻卷沙灘  
十萬軍聲吼鳴瀑牧童家住溪西曲侵早騎牛牧溪北  
荒忙冒雨急渡溪雨勢驟晴山又綠

冬日述懷

寒入肌膚粟已生銀河凍合水無聲梅花漏泄春先到  
風色商量雪未成有愧何須問天理無求方始合人情  
男兒未際風雲會辜負胸中十萬兵

暮春述懷

一年春事已差遲又見楊花貼水飛梁燕不憂驚午枕  
箔蠶生怕誤春衣景逢佳處須行樂事到難時且式微  
幸有黃雞并濁酒且和風月醉柴扉

幽居



十頃平湖一簇山湖山佳處著朱闌分堦草色迎春綠  
漱石泉聲入夜寒不擾自然人事好有為方信世途難  
如今休說當年事只把心平氣定看

謝二劉

雁行臨慰暖如春玉粒金包即拜恩周粟不肥清聖肉  
楚絲難繫直臣魂二生在昔聞孤竹一死於今媿屈原  
圓簠下頒誠有謂此情兄外更誰論

暮春

買春無計託花神  
費盡榆錢不計緡  
風絮飛成三徑雪  
雨犁翻動一園春  
有心報國從招禍  
無相關怨貧  
試問登壇與分社  
予何人彼亦何人

呈諸同舍

洛陽年少不知幾  
十載南州賦式微  
三舉不登黃甲去  
兩庠空笑白丁歸  
頭長賈昔過三尺  
腰大臣今徒十圍  
祇恐金鑾不前席  
誰云無策富王畿

寄陳士元

郊野英雄不肯收膏粱芻豢有何謀胡兒只怒馬黃弩  
公子當求狐白裘唐詔屢頒黃不第漢壇才築信當侯  
古今得喪同兒戲何必區區嘆白頭

貧居

貧居不暇理掾茅只倩江山圍一遭林鳥樂時知地僻  
嶺雲閒處覺天高春衫著破重連線酒擎乾猶榨糟  
且把盃盤聊自遣不須平地起風濤

安分呈李竹齋

風雨思君子烟霞憶舊遊一區山水國萬里帝王州  
臘  
瓮香浮玉春旗雪滿甌安貧隨處樂此外復何求

拜茶

北苑春將半星楂欲奏功杵鳴千臼雪鎗卷一旗風  
蓋  
錦鸚毛翠簽羅象眼紅封成拜玄鶴飛上紫微宮

寄趙及父

欲邀詩社同蓮社為築將壇并杏壇圖得有才皆命世  
不隨風月報平安

有感

千困未必將軍喜五斗難消令尹愁若使淵明逢魯肅  
折腰應到腳跟頭

桃花

紅雨隨風散落霞行人幾誤武陵家牧童若向青帘見  
應認枝頭作杏花

弦月

人間離別最堪憐天上嫦娥恐亦然昨夜廣寒分破鏡

半奩飛上九重天

呈魯功甫

拂面東風二月天  
綠楊芳草暗平川  
花容著雨鬪翻錦  
春色惱人催禁烟  
燈夜雖然君有約  
花時却恐我無緣  
直須得暇來相訪  
當約嫦娥伴醉眠

勉馮著明

主憂臣辱已難堪  
國事顛危況未安  
溺嫂臨淵猶愛手  
鬪人同室尚纓冠  
公如不唱從軍樂  
士亦恐歌行路難

麟閣功名總勞苦莫將行役作辛酸

藕花

惜絲不肯織宮鞋花月仙人謫下來  
河伯借泥封玉腕風神翻浪沃香腮  
無房不許蜂留宿有蓋嘗令鷺自開  
何事冤仇結青女一朝收拾付塵灰

自勉

世態風波不可論且于閒處樂天真  
肥家無子堪登隴憂國有人休問津  
顏色雖蒙時借我腳跟那解日隨人

客來若問當時事，搖手無言對北鄰。

初夏即事

陰晴未判落梅天，柳巷無人絮撲羶。  
滌器倒囊尋市醖，喚船挑網得溪鮮。  
鳥聲呼夢客千里，山色撩人句一聯。  
遐想故人應念我，馬蹄何處夕陽邊。

呈鍾子嚴

那條路不通，長安莫把心腸獨。  
自剗有釀，何須兒索飲。  
無有徒勸客，加餐千金不賞思。  
歸楚萬戶無封，願識韓



大抵利名些子耳幾多豪傑被縈絆

寄楊渭夫

自媿材猷不足觀獨於忠義死難干二陵風雨應歸漢  
萬里山河誰報韓眼到北盟常搵血髮當南渡始衝冠  
如何一代名人傑稽首稱藩鼻不酸

幽居

瀟洒幽居屋一重入門花柳間青紅簾常礙月鈎常掛  
酒不逢花盞不空畏愛難全公子日雌雄誰識大王風

且將酒貨遷詩料休問權場通未通

呈王君庸

主人意重出霓裳客子愁多欲斷腸  
眉黛暗傳春去恨臉紅猶帶夜來粧  
竹根稚子肌膚滑葉底荷花語笑香  
多少英雄在巫峽漫將詩思惱襄王

寄西山

宮牆無地可穿窬猶幸先人有敝廬  
仕版可羞寧毀瓦儒冠曾誤枉收書  
供柴我合同收炭寄食君當自辦蔬

此理曉然明似鏡何須足下肆耕鋤

呈李朝舉

一片忠肝照日明濟時無策苦傷情  
顰牙撫几悔南渡和淚挑燈編北盟  
漢用檄招三十郡楚因歌散八千兵  
太平若鬪生靈肉何用生靈望太平

白面渡

繫船白面問溪翁名不虛傳說未通  
祇恐當年溪上女浣沙時節懶勻紅

卷二百四十五  
邱食責庖者

陋邸已無味庖人更不材  
盪吹全做粥燒鰲半成灰  
添醋酸綿齒研椒辣木腮  
何時聳堂嚮香靄霧樽壘

秋意

木剪空山瘦西風埽落黃  
荷殘簪失蓋菊老餅還香  
詩盡闕尤濶愁多夜更長  
悶懷無處著隨雁落瀟湘

慰吳吉甫縣尉

子鍼如京師一室膏鼎鑪  
兄室雖被戕一妻猶可免  
伯

奢事行役八子俱蹂踐兄家禍雖劇一女特婉孌女死  
固可傷殊未敵冠冕妻在固全軀喪女憂莫遣大厦既  
灰飛豐儲皆席卷鵲鳩起嘆嗟鸞鳳徒輾轉我昔以難  
勤荷兄垂勸勉況今以難告倍覺淚洟忍汎觀天之理  
禍福嘗相反有難既不死他時非淺淺去兄一牛鳴為  
地良非遠不能具兄慰面目實有覲自料吾與兄氣量  
及者慙胡為蒼者天與子獨羈蹇

送倪尚書歸雪川

筆麟圖鳳久無聲何事權輿復見今魯祭不因夫子肉  
齊卿難奪孟軻心我公去就何為重吾道興亡所繫深  
安得斯文天未喪載歌狼跋繼遺音

兩宋名賢小集卷二百四十五

欽定四庫全書

兩宋名賢小集卷二百四十六

宋 陳思 編

元 陳世隆 補

翠微南征錄 五

華岳

小春言懷

桃李生香花滿谿南州十月尚襜衣春從酒斝榨將出

秋在詩囊帶得歸弓射十分方破的棋高一著便爭機  
勸君莫作等閒看毫髮差殊事已非

春愁

十日春愁不出門出門春事已消魂  
摘花掀帽倩人插索酒得杯和月吞  
啼鳥聲中近寒食落花陰裏又黃昏  
春來春去總休問往事悠悠付一樽

呈徐商卿

十年憂患謫東南萬事於心了不關  
病去只愁雙足軟



老來且喜一身閒  
人情無處便生怨  
天道有時猶好還  
大抵久長居富貴  
到頭天意亦須慳

春遊有感

上苑春工到海棠  
老夫隨分為春忙  
朱絃轉軫鶯催拍  
紅粉倚闌花鬪粧  
吾道幾時曾損益  
人心今日自炎涼  
願言相約花前醉  
一聽兒童號酒狂

憂

憂吾所謂果何憂  
憂國憂家卒未休  
坐法馬遷方去漢

釋囚箕子未歸周西風萬籟聲聲恨夜雨踈桐點點愁  
有客不知吾所向却將米價問南州

述懷

我生胸次不塵埃不學兒曹剛自媒詩料雖憑風月製  
宦途還聽鬼神開十年教養闕功名念已灰

安得金鑾有清問賈生何事未歸來

套筒

作箇咿嘵贅項咽箇中和我萬愁牽一箇作柄簫無竅

雙鐵為團扇有圈身拜却疑人似犬手擎還類筆如椽  
從今節節能通氣安得常為積蓄錢

春郊即事

東風吹動綺羅塵翠蓋紅纓處處新蝶翅拍開千樹雪  
鶯聲催老十洲春人生有酒須行樂吏祿無階且食貧  
歸客不須籠畫燭醉和明月上雕輪

雪

天低江濶水連天上下周圍一色兼撲雀獵鷹翻白縞

得鱸漁父指青帘馬拋玉勒瓊琬落獅欠金鈴橘柚添  
得句莫嫌呵凍筆明年歲事已堪占

田家十絕

十幅生絹一墨池盡收好景入屏幃會須少緩丹青筆  
更倩牧童橫笛歸

農夫日炙面如煤絲婦縑成雪一堆早早安排了官稅  
莫教耆長上門催

老農鋤水子收禾老婦攀機女擲梭苗絹已成空對喜

納官還主外無多

鷄唱三聲天欲明  
安排飯碗與茶瓶  
良人猶怒催耕早  
自扯蓬窗看曉星

緋袴青衫紫繫腰  
攬衣隨過水平橋  
雖然不識風流事  
也向人前學逞嬌

村獃奮迅出籬笆  
欲吠還休喚可拏  
不是忘機太馴狎  
那回曾宿那人家

畫眉無墨把燈燒  
豈識宮粧與翠翹  
堪笑東風也相謔

暗牽裘帶纏人腰

鱖魚炊糝作荷包宿飯無湯煖酒燒放椀出門行一匝  
小溪新漲已平橋

麥飯瓜羹及早催田夫雙眼望儂來油鹽不倩旁人帶  
日午痴兒猶未回

拂曉呼兒去採樵囑妻早辦午炊燒日斜枵腹歸家看  
尚有生枝炙未焦

驟雨

牛尾烏雲潑濃墨牛頭風雨翻車軸怒濤頃刻捲沙灘  
十萬軍聲吼鳴瀑牧童家住溪西曲侵早騎牛牧溪北  
慌忙冒雨急渡溪雨勢驟晴山又綠

別王泰之

黃塵漫漫小峯路白石齒齒茗坑渡相亭南來第一程  
人烟蕭條歲云暮故人小隱三家村約我旗亭聊一樽  
相逢此地復相別明朝懷抱同誰論

江上雙舟催發

前帆風飽江天濶後帆半出踈材闕後帆招手呼前帆  
畫鼓輕敲總催發前帆雪浪驚飛湍後帆舵尾披銀山  
前帆漸緩後帆急相傍俱入蘆花灘島嶼縈迴斷還續  
沙尾夕陽明屬玉望中醉眼昏欲花誤作閒牕小橫軸

贈劉相士

班超未侯漢誰識烏孫客韓信已王齊誰知長樂危彼  
亦非異術忠諛分黑白直道世且違彼亦何足責自古  
勲業人把鏡惟自索顧我洒落資足可振翰翮如何汗



馬秋英雄尚南謫祇應捻胎鬼手段不合格古括子劉  
子閱人幾千百一見麀鼠質便許正疆場知子忠且諛  
愚固未暇擇萬一符子言亦可名簡冊他時雙蹇驢與  
子訪黃石

誚胡同巡

岳昔遊時卿兄嘗過弊廬捫心論事業耐久良非虛岳  
今隸城旦氣象誠慘舒髡黥塞糞壤敢辱長者車嘗聞  
古人交窮達無親疏富貴不相忘有終還有初與兄三

載別無日不引裾中間喜一見欣慰云何如相去天一  
涯雲濤疏雁魚忽聞夙駕回喜色喧門閭相聞即相別  
厥意良躊躇嘗聞郢中人結客於樵漁又聞淮南王受  
德於刑餘岳既不自檢失身墮蘧蔡壯士視一死其猶  
爾歔歔勢分已霄壤孤賤難相於願兄此召還巍然奉  
中除前巖與西閣談笑看連茹或遇趙可父為岳聲起  
居薰風有良便當拜平安書

題富沙廟

丙寅七月晦富沙居民火延燒至平政  
橋烟焰環照定王之祠吏民俱禱旋獲

反風之應環祠民屋悉為煨燼而祠之  
簷桷無一焦灼因感神之威靈而詩之

平政橋頭火爍空富沙宮殿烈烟中地  
形難撲徒臨水天意能回遽反風十里  
爆雷驚客夢萬家金壁賴神功君王注  
意恢神武更乞威靈為保沖

次翁正叔溪山勝遊之韻

溪南風物照窗扉溪北蘭舟纜翠微雙  
槳碧雲苔草合一簾紅雨杏花飛只知  
有酒酌佳景却恨無繩繫落暉更約風  
流衆年少明朝依舊莫相違

春郊即事

東風吹不斷輪蹄處處鞦韆環珮飛剪翠弄粧歸髻掠  
亂紅翻錦上屏幃花應笑我春常醉燕解嘲人夜不歸  
莫恠逢春太娛樂人生能有幾芳菲

悶題

此心忠義出天資奴隸兒童莫強為燕雀不知鴻鵠志  
牛羊徒飾虎狼皮事當榮犬吠堯日書在塞鴻歸漢時  
拔劍問天天不語料天還愧負男兒

呈陳平仲

達人安分樂平生不與陰陽造化爭  
漢節有人恭且止楚盤無客遂當行  
薦公地粟三杯酒分我天香一味羹  
大抵有施須有報木桃瓊玖愧詩評

紙帳

主人冰雪洒胸襟買宿銀城不計緡  
春草有詩皆白雪秋毫無夢到紅塵  
月娥好作雲間侶風伯不寒冰下人  
更喜五更窗外月梅梢分得一枝春

兵

兵貴先人斯奪人莫教間諜漏真情漢因有備胡終退  
秦為無人楚始爭卦向爻中分損益棋於局上定輸贏  
不知都督三邊者還肯江湖問一聲

自訟

我生素不事詆諆檐板方頭喚不回遇事豈容無正論  
濟時未必有長材頭雖五鼎不辭劒口恐三緘合用枚  
不是平生太剛介如何蹤跡尚塵埃

紀事

古今多少好英雄未必奸邪未必忠上黨鼎膏留地白  
長平坑血濺天紅三邊傳檄兵雖息二榷開場貨未通  
更願年豐富金帛飽裝駝駕為和戎

過鄱陽湖

北風翻雪鼓雷霆舟子停蘭亦斷魂看我金鱗三十六  
為君一躍上龍門



兩宋名賢小集卷二百四十六